

# Sanaartorfissagissaaneq, pisortat kuuffeqarfinnut aqquersuutaat aamma pisortat aqqusiniutaat pillugit Inatsisartut inatsisaat

## Kapitali 1

### *Siunertaq atuuffissaalu*

§ 1. Inatsisartut inatsisaat manna sumiiffinni sanaartorfingeqanngitsuni sanaartorfingeqarsimasunilu sanaartorfissagissaanermut atuuppoq, aammalu sanaartorfissagissaanernut, kommuninit aqunneqartunut akiliutissanik akiliisarnermut aalajangersakkanik aalajangersaaffulluni.

§ 2. Pisortat kuuffeqarfinnut aqquersuutaat aamma pisortat aqquserni pisuinnarnullu aqqusernit Inatsisartut inatsisaanni aalajangersakkani pineqartunut ilaapput.

## Kapitali 2

### *Taaguutit*

§ 3. Sumiiffimmi sanaartorfissagissaaneq Inatsisartut inatsisaanni matumani paasineqassaaq tassaasoq sumiiffik, nunap nunallu ilusaata suliarineratigut, assersuutigalugu kuuffeqarfilersuilluni aamma aqqusinniorluni, illuliorfigiuminarsarneqartoq imaluunniit kommunimut pilersaarummut naapertuuttumik allatut atoruminarsarneqartoq.

*Imm. 2.* Suliffeqarfiit pilersuisuusut matumani paasineqassaaq tassaasuut suliffeqarfiit innaallagissamik, imermik kiassarnermillu pilersuisuusut.

§ 4. Pisortat kuuffeqarfii matumani paasineqassaaq tassaasut aqquersuutit matoqqasut, imermik igitassamik immamut kuuffittut atorineqartut aammalu kommunimit aqunneqartut.

*Imm. 2.* Imeq igitassaq Inatsisartut inatsisaanni matumani paasineqassaaq tassaasoq imeq sunaluunniit najugaqarfinnit, suliffeqarfinnit illunillu allanit kuutsinneqartoq.

*Imm. 3.* Nassuiaassutit uku tunngavigalugit kuuffeqarfiit kuuffinnut pingaarnernut aamma kuuffinnut ikkuffinnut immikkoortinneqassapput:

1) Kuuffimmi pingaarnermi ataatsimi illut marluk amerlanerusulluunniit sullinneqartut, illut tamarmik immikkut ingerlatsivittut immikkoortuuppata, imaluunniit illut marluk amerlanerusulluunniit ataatsimut ingerlatsivittut immikkoortuuppata, kisiannili illutaat illoqatigiinnut ataatsinut ilaangippata.

2) Kuuffimmut ikkuffimmi illu ataaseq ingerlatsivittut immikkoortutut ataatsitut immikkoortoq,

imaluunniit illut amerlanerusut, illut taakku ingerlatsivimmut ataatsimut immikkoortuppata, illoqatigiinnullu ataatsimoortunut ilaappata.

**§ 5.** Pisortat aqquserni matumani paasineqassaaq tassaasut aqqusernit sumiiffillu nalinginnaasumik tamanut ammasut aammalu kommunimit aqunneqartut.

*Imm. 2.* Pisortat pisuinnarnut aqquserni matumani paasineqassaaq tassaasut aqquernit nalinginnaasumik pisuinnarnut sikkilertunullu angallaviusut, aammalu kommunimit aqunneqartut.

### **Kapitali 3.**

#### *Kuuffeqarfinnut aqqusinernullu oqartussaasut*

**§ 6.** Naalakkersuisut kuuffinnut aqqusinernullu pingaarnertut oqartussaasuupput.

*Imm. 2.* Kommunalbestyrelsi najukkami kuuffeqarfinnut oqartussaaffimmik ingerlatsisuuvoq, aammalu kommunip killeqarfiata iluani illuliorfusimasuni pisortat kuuffeqarfiutaanik nutaanik pilersaarusiornermut sanaartormermullu, aammalu kuuffeqarfinnik pingaarnernik ingerlatsinermit aserfallatsaaliuinerermullu akisussaasuulluni.

*Imm. 3.* Kommunalbestyrelsi najukkami aqqusinernut oqartussaaffimmik ingerlatsisuuvoq, aammalu kommunip killeqarfiata iluani illuliorfusimasuni pisortat aqqusinutaannik pisuinnarnullu aqqusinutaannik nutaanik pilersaarusiornermut sanaartormermullu, kiisalu aqqusinernik ingerlatsinermit aserfallatsaaliuinerermullu akisussaasuulluni.

*Imm. 4.* Najukkami oqartussaaneq pillugu Naalakkersuisut maleruagassiorsinnaapput, tak. imm. 2-3, taakkunungalu pilersaarusiornermut, ingerlatsinermit aserfallatsaaliuinermit, naatsorsuutininik saqqummiussisarnermut il.il. piumasaqaatit ilaapput.

### **Kapitali 4.**

#### *Kuuffeqarfinnut aqqusinernullu pitsaassuseritassat nalinginnaasut aamma nalunaarsuiffiit*

#### *Piginnaatitsissut*

**§ 7.** Pisortat kuuffeqarfiutaannik aamma pisortat aqqusinutaannik sanaartornissamut, aserfallatsaaliuinissamut ingerlatsinissamullu maleruagassanik malitassanillu Naalakkersuisut aalajangersaasinnaapput, taakkununga ilanngullugit annertussusiliinissamut, atortunik toqqaanissamut, isumannaallisaanissamut, pitsaassuseritassanut nalinginnaasunut, suliaqarnissamut il.il. piumasaqaatit.

#### *Nalunaarsuiffiit*

**§ 8.** Asiaq, Kalaallit Nunaanni Misissueqqaarnerit, qitiusumik nalunaarsuiffimmik, kuuffeqarfinnut aqqusinernullu paasissutissanik nunallu assinginik aqutsisuuvoq, aammalu ilaatigut kommuninit nalunaarutit, ilaatigullu nammineerluni sumiiffimmi nakkutilliinermigut nalunaarsuiffinnik iluarsisarnini tungavagalugit nalunaarsuiffimmik isumaginnittuulluni.

*Imm. 2.* Kommunit pisussaapput kuuffeqarfinni taamatullu aqqusinerni sanaartukkat nutaat, allanngortitsinerit, matusinerit allannguutillu annertuut allat pillugit, qitiusumik nalunaarsuiffiit

iluarsineqarnissaat siunertaralugu Asiaq-mut ingerlaavartumik ilisimatitsisassallutik, tak. imm. 1.  
*Imm. 3.* Asiaq pisinnaatitaavoq, qitiusumik nalunaarsuiffimmit imm. 1-imi taaneqartumit paasissutissanik nunallu assinginik tunniussinermut akiliitsissalluni.  
*Imm. 4.* Kuuffeqarfinnik aqqusinernillu qitiusumik nalunaarsuiffimmik suliaqarnissamut iluarsisarnissamullu Naalakkersuisut maleruagassiorsinnaapput.

## **Kapitali 5.**

### *Sanaartorfissagissaanermut aalajangersakkat ataatsimoorussat*

#### *Sanaartorfissagissaanermik aallartitsineq*

**§ 9.** aqqusiornerit sulluunniit, pisortat aqqusiniutaanni assaanissamik pisariaqartitsiviusut kommunalbestyrelsi assaanissamut akuersissuteqareertinnagu aallartinneqassanngillat. Taamaattorli iluarsaassilluni sulinerit utaqqitinneqarsinnaanngitsut akuersisummik immikkut peqqaarnani suliarineqarsinnaapput, tamanna pillugu nalunaaruteqarneq tamatuma kingorna piaartumik kommunalbestyrelsimut pisimappat.

**§ 10.** Nunaminertat sanaartorfigineqarsimanngitsut illuliorfissatut atorneqarnissaat imaluunniit kommunimut pilersaarummut naapertuuttumik siunertanut allanut atorneqarnissaat siunertaralugu sanaartorfissagissaanermik kommunalbestyrelsi aallartitsisinnaavoq. Tamatuma saniatigut sumiiffimmi nunaminertami tamakkiisumik ilaannaasumilluunniit sanaartorfissagissarneqarsimasumi sanaartorfissagissaanermik ilassutaasumik kommunalbestyrelsi aallartitsisinnaavoq.  
*Imm. 2.* Imm. 1 naapertorlugu sanaartorfissagissaanermi kommunalbestyrelsi suliffeqarfimmut pilersuisuusumut ataatsimut amerlanerusunulluunniit isumaqatigiissuteqareernermigut aqqusersuusersuinernik, nalinginnaasumik suliffeqarfinnit pilersuisuusunit ataasiakkaanit isumagineqartartunik tamakkiisunik ilaannaasunilluunniit aallartitsisinnaavoq. Aqqusersuusersuinerit naammassinerini suliffeqarfiit pilersuisuusut ataasiakkaat pilersuineri aqqusersuutit pineqartut ingerlanneqarneranni aserfallatsaaliorneqarnerannilu akisussaaffimmik tigusissapput.

**§ 11.** Inuit, sullissiviit imaluunniit ingerlatseqatigiiffiit sumiiffimmi nunaminertamik sanaartorfissagissarneqanngitsumik ataatsimik amerlanerusunilluunniit atuinissamut pisinnaatitaaffeqartut, nammineerlutik akilikkaminnik sanaartorfissagissaanissaq, nalinginnaasumik kommunalbestyrelsimut suliffeqarfinnillu pilersuisuusunit suliarineqartussaq pisariaqartinneqartoq tamakkiisumik ilaannaasumilluunniit suliaritissinnaavaat.  
*Imm. 2.* Illunik, sumiiffimmi tamakkiisumik sanaartorfissagissarneqanngitsumi piginnittut nammineerlutik akilikkaminnik sanaartorfissagissaanissaq, nalinginnaasumik kommunalbestyrelsimut suliffeqarfinnillu pilersuisuusunit suliarineqartussaq pisariaqartinneqartoq tamakkiisumik ilaannaasumilluunniit suliaritissinnaavaat.  
*Imm. 3.* Imm. 1 aamma imm. 2 naapertorlugit sanaartorfissagissaanerit, tassungalu ilanngullugit sanaartorfissagissaanissamut teknikkikkut aningaasaqarnikkullu piumasaqaatit, aallartinneqannginnerini kommunalbestyrelsimut aamma suliffeqarfinnut pilersuisuusunut sanaartorfissagissaanermi kalluarneqartussanut isumaqatigiissutigineqarsimassapput akuerineqarsimassallutillu.

Sanaartorfissagissaanerup naammassinerani sanaartorfissagissaanerit immikkoortui ataasiakkaat suliffeqarfinnut pilersuisuusunut kalluarneqartunut tunniunneqassapput, tamatumalu kingorna aqqusersuutit pingaarnerit il.il. ingerlanneqarnerinut aserfallatsaalineqarnerinullu akisussaaffik taakkunannga tiguneqassaaq.

### *Akiliutit*

**§ 12.** Inuit imaluunniit ingerlatseqatigiiffiit sumiiffimmi sanaartorfissagissarneqarsimasumi nunaminertamik atuinnissamut pisinnaatitaaffimmik pissarsisut sumiiffimmi sanaartorfissagissaanerit akiliuteqassasut kommunalbestyrelsip kommunimut pilersaarummi aalajangersinnaavaa.

*Imm. 2.* Imm. 1 naapertorlugu akiliutissat agguassinnissamut malitassaq, kommunalbestyrelsip kommunimut pilersaarummi aalajangersarsimasaa, imaluunniit imm. 4-miit 7-imut maleruagassat naapertorlugit akiliutissatut nalinginnaasutut aalajangersarsinnaasaa ikiortigalugu naatsorsorneqarsinnaavoq.

*Imm. 3.* Imm. 2 naapertorlugu agguassinnissamut malitassaq ikiortigalugu naatsorsuineri, agguassinnissamut malitassaq, sumiiffimmi sanaartorfissagissaanerit aningaasartuutinit tamarmiunits, kommunip sanaartorfissagissaanerit ilaannut akiliussigallarnerinik, suliffeqarfimmut pilersuisuusumut ataatsimut amerlanerusunulluunniit isumaqatigiissut naapertorlugu kommunip utertissimasaanik imaluunniit nunap karsianiit sanaartorfissagissaanerit tapiissutisarisimasaanik ilanngaaserneqartunit amerlanerusussaangitsunik aningaasartaqartinneqartoq atorineqassaaq. Sanaartorfissagissaanerit aningaasartuutinit tamarmiunitsut sumiiffimmi sanaartorfissagissaanerit aningaasartuutit toqqaannartumik attuumassuteqartut kisimik ilanngunneqarsinnaapput, taakkunannga ilaapput aqutsinnerit, pinngitsaaliissummik taarsiissutitalimmik pigisanik piginnikkunnaarsitsinnerit, pilersarusiornerit, sanaartornerit, nakkutilliinnerit il.il. aningaasartuutit.

*Imm. 4.* Inissiaqarfinni illunik ilaqutariinnut ataatsinut inissianik, illunik affarleriinnik, illunik uiguleriinnik/illunik uigulukuttunik assigisaannilluunniit ataatsimoorutunik illutalinni imm. 1 naapertorlugu akiliutissaq, kommunimi tamarmi imaluunniit illoqarfiit aalajangersimasut iluanni, illoqarfilluunniit ilaanni imaluunniit nunaqarfinni immikkoortumut ataatsimut akiliutitut ataatsimoorussatut nalinginnaasutut atuutinneqartoq tunngavigalugu aalajangerneqarsinnaavoq.

*Imm. 5.* Inissarsuarni inissianut imm. 1 naapertorlugu akiliutissaq, kommunimi tamarmi imaluunniit illoqarfiit aalajangersimasut iluanni, illoqarfilluunniit ilaanni imaluunniit nunaqarfinni inissianut ataasiakkaanut akiliutitut ataatsimoorussatut nalinginnaasutut atuutinneqartoq tunngavigalugu aalajangerneqarsinnaavoq.

*Imm. 6.* Illuni imm. 4-mi aamma 5-mi pineqartunut ilaangitsuni, imm. 1 naapertorlugu akiliutissaq, kommunimi tamarmi imaluunniit illoqarfiit aalajangersimasut iluanni, illoqarfilluunniit ilaanni imaluunniit nunaqarfinni inini quleriinni kvadratmeterimut akiliutitut ataatsimoorussatut nalinginnaasutut atuutinneqartoq tunngavigalugu aalajangersarneqarsinnaavoq.

*Imm. 7.* Imm. 4-miit 6-imut akiliut nalinginnaasoq kommunimut pilersaarummi imaluunniit kommunip ileqqoreqqusaanni nalunaarutigineqarsimassaaq. Akiliutip nalinginnaasup aningaasartassaasa angissusilerneqarnissat eqqarsaatigalugu sanaartorfissagissaanerit akiliut, kommunalbestyrelsip sumiiffinni assingusumik ilusilimmi sanaartorfissagissaanerit akiliutissatut nalinginnaasutut imm. 3 malillugu naatsorsorlugu aalajangersaanissatut, sumiiffinni assingusuni kommunip ukiuni kingullerni

pingasuni sanaartorfissagissaanermut aningaasartuutit inaarutaasumik naatsorsorsimasaasa agguaqatigiissinneqarnerinit annerutinnagu aammalu sanaartorfissagissaanermut aningaasartuutitut tunngavissaq malillugu akinut iluarsiinertalerlugu aalajangerneqassalluni.

**§ 13.** § 10, imm. 2 naapertorlugu kommuni sanaartorfissagissaanermik ilassutaasumik aallartitsippat, sumiiffimmi nutaanik sanaartortoqarnerani, aamma sanaartukkat kuuffeqarfimmut pingaarnermut atassuserneqarnerini ilassutaasumik sanaartorfissagissaanermut akiliuteqartitsisoqassasoq kommunalbestyrelsi kommunimi ileqqoreqqusani aalajangiisinnaavoq.

*Imm. 2.* Imm. 1 naapertorlugu akiliutissaq § 12, imm. 2-miit 7-imut maleruagassat naapertorlugit aalajangersarneqassaaq.

**§ 14.** §§ 12-13-imi aalajangersakkat naapertorlugit akiliutissamik akiliuteqartitsisarnissamut piumasaqaatit kommunalbestyrelsip aalajangersassavai, taakkunungalugu sumiiffimmi sanaartorfissagissaanermi aningaasartuutit inaarutaasut naatsorsorneqareernerini akiliutip iluarsineqarsinnaaneranut piumasaqaatit ilaatinneqarput.

*Imm. 2.* Inatsisartut inatsisaata matuma atuutilernerata kingorna sumiiffimmi 1. januar 1998 sioqqullugu sanaartorfissagissarneqarsimasumi sanaartornermi, imaluunniit Inatsisartut inatsisaata matuma atuutilernerata kingorna sumiiffimmi 1. januar 1998 sioqqullugu pisortat kuuffeqarfinik pilersorneqarsimasumi attaviliinermi akiliuteqartitsisoqassanngilaq, kommunimut imaluunniit sumiiffimmut pilersaarummi atuuttumi, Inatsisartut inatsisaata matuma atuutilertera sioqqullugu nalunaarutigineqarsimasumi akiliummik akiliisitsisarnermut allanik aalajangersaasoqarsimanngippat.

#### *Naatsorsuutit*

**§ 15.** Sanaartorfissagissaanermut aningaasartuutit inaarutaasumik akilerneqarsimasut pillugit kommunalbestyrelsi ukiumoortumik naatsorsuusiussaaq.

*Imm. 2.* Kommunimi sanaartorfissagissaanermut naatsorsuusiortarnermut maleruagassanik Naalakkersuisut aalajangersaasinnaapput.

#### *Pinngitsaaliissummik taarsiissutitalimmik pigisanik piginnikkunnaarsitsisarneq*

**§ 16.** Tamanut iluaqutaasussat eqqarsaatigalugit pisariaqartinneqarpat, kommunalbestyrelsi pisortat kuuffeqarfinik aamma pisortat aqquerninik sanaartornissaq siunertaralugu pinngitsaaliissummik taarsiissutitalimmik pigisanik piginnikkunnaarsitsiniarnermik aallartitsisinnaavoq.

*Imm. 2.* Pisortat kuuffeqarfinik aamma pisortat aqquerninik sanaartornissaq siunertaralugu pinngitsaaliissummik taarsiissutitalimmik pigisanik piginnikkunnaarsitsiniarnermik aallartitsineq, pinngitsaaliissummik taarsiissutitalimmik pigisanik piginnikkunnaarsitsisarneq pillugu Inatsisartut inatsisaanni maleruagassat malillugit ingerlanneqassaaq.

*Imm. 3.* Isumaqtigiissut pillugu isumaqtigiittoqarsinnaanngippat, taarsiissutissat pinngitsaaliissummik taarsiissutitalimmik pigisanik piginnikkunnaarsitsisarnermut ataatsimiititaliamit aalajangerneqassapput, aammattaaq tak. taarsiissutitalimmik pigisanik piginnikkunnaarsitsisarneq pillugu Inatsisartut inatsisaanni maleruagassat.

## Kapitali 6.

### *Kuuffeqarfinnut attaviliisarneq*

**§ 17.** Pisortaqarfiit kuuffeqarfiutaat taamaallaat imermik igitassamik kuutsitsinermut atugassatut aalajangerneqarsimapput. Taamaallaat pisuni immikkut ittuni aamma taamaallaat siumoortumik kommunalbestyrelsimut akuersisummik piniareernerme imeq sialummit, aputip aanneranit imaarsaanermilu pinngortoq pisortat kuuffeqarfiutaasigut kuutsinneqarsinnaavoq.

**§ 18.** Illuut pisortat kuuffeqarfiutaasa inissisimaffinut inissinneqarpat imaluunniit inissisimappat, piginnittut kikkulluunniit illuutip kuuffeqarfiinik pisortat kuuffeqarfiinut pingaarnernut attaviliinissamut pisinnaatitaapput.

*Imm. 2.* Imm. 1 naapertorlugu attaviliinerme kuuffeqarfiup pingaarnernup pitsaassusia atorneqarneratalu annertunerulernissaa tunngavigalugu naammaginantumik atorsinnaanissaa, aammalu illuutip kuuffeqarfiisa kommunalbestyrelsimut akuerineqarsimanissaa piumasarineqarpoq.

**§ 19.** Kuuffeqarfinnut attavimmik sananissamut allanngortitsinissamullu akuersissut kommunalbestyrelsimut, aammattaaq suliap ingerlanneqarnerani nakkutilliisuusussamut piniarneqassaaq. Taamatuttaaq illuummi attavilernerqarsimasumi erngup igineqartartup suussusia annertussusialu annertuumik allanngortinneqassappat, tamanna sioqqullugu kommunalbestyrelsip akuersissutaanik piniartoqaaqassaaq.

*Imm. 2.* Kommunalbestyrelsi kuuffimmut ikkuffinnik, kingusinnerusukkut ataatsimik amerlanerusunilluunniit kuuffeqarfittut pingaarnertut atorneqartussanik akuersissuteqarnerminni, kuuffeqarfiup maleruagassat, kuuffeqarfinnik pingaarnernik sananermi malinneqartussat malillugit sananeqarnissaa piumasarisinnaavaat.

*Imm. 3.* Kuuffinnut ikkuffiit kuuffeqarfinnut pioreersunut attavilernerqarsinnaapput, imm. 2 naapertorlugu kuuffeqarfinnik piginnittup tamanna akuerippagu. Tassanili imm. 2 naapertorlugu kuuffeqarfik pingaarneq pineqarpat, kuuffeqarfiup ingerlanneqarnera aserfallatsaaliorneqarneralu kommunalbestyrelsip tigussavaa.

**§ 20.** Kuuffeqarfinnik sanaartornermut taakkulu kuuffeqarfinnut pingaarnernut attavilernerqarnerinut aningaasartuutit illut ataasiakkaat piginnittuisa akilissallugit pisussaaffigaat.

*Imm. 2.* Kuuffeqarfinnut ikkuffiit ingerlanneqarneri aserfallatsaaliorneqarnerilu illumik piginnittup akisussaaffigai.

*Imm. 3.* Kuuffeqarfinnut ikkuffiit pisortat kuuffeqarfiutaasa ingerlanneqarnerisa isumannaassusaannut ulorianartorsiortitsinissaa kommunalbestyrelsip paasiguniuk, peqqussutit malillugit iluarseqqusilluni kommunalbestyrelsi piumasaqarsinnaavoq. Piffissarititaasoq malinneqanngippat kommunalbestyrelsi nammineerluni piginnittup akiligaanik peqqussutit malillugit aqqusersuutinik iluarsisinnaavoq.

## Kapitali 7.

### *Pisortat aqqusiniutaannik atuisinnaaneq*

**§ 21.** Kommunalbestyrelsi akuersiteqqaarnagu illunit imaluunniit nunaminertanit killilikaniit qamutunut assakaasulinnut taamatullu pisuinnarnut aqqusinernik pisortat aqqusiniutaannut attaviliisoqaqqusaanngilaq.

*Imm. 2.* Aqqusinernik nutaanik sanaartornermi imaluunniit aqqusinernik pioreersunik allangortiterinermi illunit imaluunniit nunaminertanit killilikaniit aqqusinermit attaviliinissami qanoq annertutigisup attavilerneqarnissaa kommunalbestyrelsip aalajangissavaa. Allangortiterinermi illup imaluunniit nunaminertap atuisinnaatitaaffusup pisortat aqqusiniutaanut attavilerneqarsimanera kipitinneqassappat, aqqusinermit attaviliinissamut pisariaqartinneqartumik allamik atuutsitsisoqalernissaa kommunalbestyrelsip qulakkiissavaa.

**§ 22.** Pisortat aqqusiniutaasa nunaminertartaanni, tassunga ilanngullugu nunaminertani aputaajaanermi apummik katersuiffusuni, kommunalbestyrelsi akuersiteqqaarnagu eqqakkanik, atortorissaarutini, atortunik, quini, quini assakaasulinnik, qamutiniq motoorilinnik nalunaarsuinermit normoqanngitsunik, qamuterallannik, pisiniafeeqqanik, allagartanik, pigisanik peerneqarsinnaasunik assigisaannilluunniit ataavartumik utaqqiisaagallartumilluunniit inissiisoqaqqusaanngilaq.

*Imm. 2.* Akuersissummik peqqaarani pigisanik il.il. imm. 1-imi taaneqartunik inissiisimasooq, peqqullugit peqqusummik naammassinninngippat, kommunalbestyrelsi pisinnaatitaavoq pineqartup akiligaanik pigisat inissinneqarsimasut piissallugit. Inissinneqarsimasut angallannermit ajoqutaappata, kommunalbestyrelsi pisariaqartillugulu politiit pisinnaatitaapput, siumoortumik ilisimatitseqqaaratik pigisat pineqartup akiligaanik piissallugit.

**§ 23.** Pisortat aqqusiniutaanni nunaminertani kommunalbestyrelsi akuersissuteqaqqaartinnagu allanguisoqassanngilaq, taakkununga ilaapput assaaneq imaluunniit qajannaarsuutiniq ikkussuineq, taamatullu aqqusernit nunaminertartaannut qanittuni aqqusernit imaluunniit aqqusernit nalunaarsorneriniq, uinganerit qalliutaanik il.il. ajoqusiiffusumik assaasoqassanngilaq, qaartiterisoqassanngilaq allanilluunniit suliaqartoqassanngilaq.

## **Kapitali 8.**

### *Maalaaruteqarnissamut aalajangersakkat*

**§ 24.** Pissutsit Inatsisartut inatsaanni matumani pineqartut pillugit kommunalbestyrelsip aalajangiineri, apeqqutitut inatsisunik tunngaveqartunut tunngatillugu Naalakkersuisunut maalaarutigineqarsinnaapput.

*Imm. 2.* Kommunalbestyrelsip aalajangiineri allaffissornikkut oqartussaasunut allanut maalaarutigineqarsinnaanngillat. Naalakkersuisut imm. 1 naapertorlugu aalajangiineri allaffissornikkut oqartussaasunut allanut maalaarutigineqarsinnaanngillat.

*Imm. 3.* Kommunalbestyrelsip aalajangiineri kimilluunniit suliamut peqataasumit maalaarutigineqarsinnaapput.

**§ 25.** Ullormit kommunalbestyrelsip aalajangiinerata nalunaarutigineqarfianiit sapaatit akunneri sisamat maalaaruteqarnissamut piffissaritinneqarput. Aalajangiinernut pisortatigoortumik nalunaaruteqarfiusunut maalaaruteqarnissamut piffissarititaasooq ullormit saqqummiussiffiusumiit aallartittarpoq.

*Imm. 2.* Aalajangiinerit maalaarutigineqarsinnaasut oqartussaasut arlaannut maalaaruteqarsinnaanermut aamma maalaarutip tunniunneqarnissaanut piffissarititaasumut paasissutissanik imaqqassapput.

*Imm. 3.* Aalajangiineq pillugu maalaaruteqarneq kinguartitsinermik sunniuteqassanngilaq. Taamaattorli maalaaruteqarneq kinguartitsinermik sunniuteqassasoq, maalaaruteqarnermut oqartussaasoq aalajangiisinnaavoq.

**§ 26.** Aalajangiinerit Inatsisartut inatsisaat manna imaluunniit Inatsisartut inatsisaat naapertorlugu peqqussusiaasut naapertorlugit allaffeqarfimmit aalajangerneqartut pillugit eqqartuussivitsigoortinneqassappata, ullormit aalajangiinerup pineqartumut nalunaarutigineqarneraniit qaammatit arfinillit qaangiutsinnagit suliaqkiissutigineqassapput.

## **Kapitali 9.**

*Atuutilerfissaa il.il.*

**§ 27.** Inatsisartut inatsisaat manna 1. januar 2011-mi atuutilissaaq.

*Imm. 2.* Tamatumunga peqatigitillugu atorunnaarsinneqarput:

1) "Kalaallit Nunaanni kuuffilersuisarnermut maleruagassat", GTO-p kaajallaasitaa nr. 11.019, 3. september 1970-imeersoq.

2) "Kalaallit Nunaanni kuuffilersuisarnermut maleruagassat", GTO-p kaajallaasitassaatusiunnersuut, 2. februar 1982-imeersoq.

*Imm. 3.* Sanaartorfissagissaanermut akiliisarneq akiliutillu agguarneqartarnerat pillugu aalajangersakkat, kommunimi aamma sumiiffimmut pilersaarutini, Inatsisartut inatsisaata matuma atuutilernissaa sioqqullugu nalunaarutigineqarsimasuni atuuttuni aalajangersarneqarsimasut atorunnaarsinneqarnissamik, iluarsineqarnissamik imaluunniit kommunimut pilersaarutini nutaanik taarserneqarnissamik tungaanut atuutiinassapput.

*Imm. 4.* "1. januar 1998 aallarnerfigalugu Sanaartorfissagissaanermut suliasat isumagisassallu qanoq agguataarneqartalernissaannik isumaqatigiissut" KANUKOKA-p aamma Namminersornerullutik Oqartussat akornanni ulloq 15. oktober 1997 isumaqatigiissutigineqartoq, atorunnaarsinneqarnissami tungaanut imaluunniit isumaqatigiissuteqartunit allannagortinneqarnissami tungaanut, atuutiinnassaaq.

*Kalaallit Nunaanni Namminersorlutik Oqartussat, ulloq 17. november 2010*

Kuupik Kleist

/

Jens B. Frederiksen



**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut